



Amaran!

Pihak Jabatan Agama Islam Perak tidak bertanggungjawab ke atas sebarang penambahan ayat selain daripada kandungan khutbah yang dikeluarkan.

## “RAJA PEMERINTAH; PAYUNG KEDAULATAN NEGARA”

5 November 2021 / 29 Rabiul Awwal 1443

الْحَمْدُ لِلَّهِ<sup>1</sup> الْقَائِلِ:

الَّذِينَ إِن مَّكَّنَّاهُمْ فِي الْأَرْضِ أَقَامُوا الصَّلَاةَ وَآتَوُا الزَّكَاةَ وَأَمَرُوا بِالْمَعْرُوفِ وَنَهَوْا  
عَنِ الْمُنْكَرِ<sup>2</sup> وَاللَّهُ عَاقِبَةُ الْأُمُورِ

(Surah Al-Hajj 41)<sup>2</sup>

Maksudnya: (Iaitu) orang-orang yang jika Kami teguhkan kedudukan mereka di muka bumi, nescaya mereka mendirikan sembahyang, menunaikan zakat, menyuruh berbuat yang makruf dan mencegah dari perbuatan yang mungkar; dan kepada Allah kembali segala urusan.

أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ، وَأَشْهَدُ أَنَّ مُحَمَّدًا عَبْدُهُ وَرَسُولُهُ. اللَّهُمَّ  
صَلِّ وَسَلِّمْ وَبَارِكْ عَلَى سَيِّدِنَا مُحَمَّدٍ<sup>3</sup> وَعَلَى آلِهِ وَأَصْحَابِهِ وَمَنْ تَبِعَهُمْ بِإِحْسَانٍ إِلَى يَوْمِ  
الدِّينِ. أَمَّا بَعْدُ، فَيَا عِبَادَ اللَّهِ! اتَّقُوا اللَّهَ<sup>4</sup> حَقَّ تَقَاتِهِ وَلَا تَمُوتُنَّ إِلَّا وَأَنْتُمْ مُسْلِمُونَ.

### Sidang Jumaat yang dirahmati Allah,

Marilah kita tingkatkan ketakwaan ke hadrat Allah SWT dengan melaksanakan segala perintah dan meninggalkan segala larangan Nya, di samping berusaha menambah ilmu dan amal, memperbanyakkan berzikir dan berselawat; mudah-mudahan kita tergolong dalam kalangan insan yang senantiasa mendapat rahmat, petunjuk serta keredaan Ilahi. Mimbar pada hari ini akan membicarakan khutbah bertajuk **RAJA PEMERINTAH; PAYUNG KEDAULATAN NEGARA.**

<sup>1</sup> Memuji Allah

<sup>2</sup> Ayat Al-Quran

<sup>3</sup> Selawat ke atas Nabi Muhammad SAW

<sup>4</sup> Pesan Taqwa



## Muslimin yang dirahmati Allah,

Pada waktu jenazah Rasulullah SAW diuruskan, sebahagian besar sahabat berkumpul di Saqifah Bani Sa'idah untuk membincangkan pelantikan khalifah bagi menggantikan Rasulullah SAW sebagai Ketua Negara. Tindakan tersebut menunjukkan pentingnya seorang ketua dipilih segera; dan rakyat serta negara tidak seharusnya tidak mempunyai ketua atau pemerintah walaupun untuk sedetik waktu.

Ketua Negara menjunjung amanah besar. Atas dasar dipertanggungjawabkan dengan amanah yang besar (jika ditunaikan), Allah mengangkat martabat mereka melebihi kedudukan rakyat biasa. Rasulullah SAW menjanjikan golongan paling utama yang akan mendapat naungan Allah di akhirat kelak ialah pemerintah yang adil. Sabda Rasulullah SAW:

سَبْعَةٌ يُظِلُّهُمُ اللَّهُ يَوْمَ الْقِيَامَةِ فِي ظِلِّهِ يَوْمَ لَا ظِلَّ إِلَّا ظِلُّهُ: إِمَامٌ عَادِلٌ...

Bermaksud: Tujuh golongan yang akan dinaungi Allah pada hari kiamat dalam naungan Nya pada hari yang tidak naungan melainkan naungan Nya, (antaranya) pemerintah yang adil...

(Riwayat Imam Al-Bukhari 6806)

Sesungguhnya sultan, raja atau khalifah ialah penyambung dan pewaris kepada tugas kenabian untuk menjaga agama dan mentadbir negara. Perkataan 'sultan' berasal daripada perkataan Arab, diulang beberapa kali dalam al-Quran. Perkataan 'sultan' boleh ditemui dalam ayat 151 Surah Ali Imran, ayat 153 Surah al-Nisa, ayat 96 Surah Hud, ayat 40, Surah Yusuf, ayat 22 Surah Ibrahim, ayat 42 Surah ah-Hijr, ayat 33 Surah al-Isra'. Di samping perkataan 'sultan', terdapat perkataan-perkataan 'Ulil Amri' atau 'Amir' dan 'Malik' yang digunakan untuk merujuk jawatan pihak berkuasa dalam sesebuah pemerintahan atau kerajaan.

Berdasarkan ayat-ayat yang berkaitan, perkataan 'sultan' memberi pelbagai erti, antaranya bukti, alasan, keterangan dan kuasa. Oleh itu, 'sultan', boleh dirumuskan bermaksud hakim atau raja; kekuasaan, kekuatan dan kedaulatan. Sultan juga memberi erti khilafah atau penguasa, atau pengganti penguasa, khalifah Rasul, iaitu orang yang menggantikan kedudukan Rasulullah SAW sebagai ketua negara atau pemerintahan, dan berperanan memelihara, melindungi dan mengembangkan kemurnian ajaran yang dibawa oleh Rasulullah SAW.



Kedatangan Islam di Alam Melayu sejak abad ketiga belas di Pasai, telah membolehkan Islam berkembang melalui perdagangan, penaklukan dan perkahwinan sehingga Islam menjadi akidah dan cara hidup kerajaan dan masyarakat Melayu setempat. Dengan rahmat Ilahi, raja-raja di Alam Melayu memilih Islam sebagai agama anutan. Berdasarkan semangat ketaatan dan kesetiaan orang Melayu kepada raja; lebih utama dipengaruhi oleh keyakinan dan kepercayaan orang Melayu terhadap kepimpinan raja, apabila Sultan Melaka pertama, Raja Iskandar Shah, menganut Islam pada tahun 1414 Masihi, rakyat berduyun-duyun mengikuti baginda.

Pemerintahan Kesultanan Melayu Melaka berperanan besar membantu perkembangan Islam di rantau ini. Alim ulama sangat dihormati dan mendapat kedudukan istimewa dalam istana. Mereka didampingi oleh setiap orang Sultan Melaka bagi mendapatkan nasihat dan bimbingan dalam urusan-urusan pemerintahan. Atas nasihat para ulama, hukum Allah dan hukum adat ditetapkan sebagai asas undang-undang. Raja-Raja Melayu memperkenankan pelaksanaan undang-undang Islam seperti Hukum Kanun Melaka, Undang-undang 99 Perak, Kanun Islam Terengganu dan Majallah Al-Ahkam Al-Adliyah Negeri Johor. Undang-undang Melaka menegaskan martabat tinggi seseorang sultan dinilai dari sudut amal makruf menyempurnakan tanggungjawab. Terkandung dalam kanun bahawa seorang raja, perlulah mengamalkan sifat-sifat perkasa lagi tegas, adil lagi saksama, pengampun lagi belas kasihan.

Sesungguhnya Islam menyuntik dimensi baru kepada tatacara pemerintahan Raja Melayu, beralih daripada pemerintahan berpaksikan manusia kepada pemerintahan berpaksikan syariah. Islam menegaskan dua perkara yang wajib diamalkan oleh Raja Pemerintah, ia itu adil dan muafakat. Islam menghapuskan fahaman lama yang menganggap raja sebagai 'penjelmaan tuhan di bumi', beralih kepada fahaman raja ialah bayangan Allah di muka bumi (zillullah fi al-Ard). Hubungan batiniah raja dengan para dewata ditinggalkan, di sebaliknya talian rohaniah dirangkaikan dengan Allah dan Rasul serta kekudusan para aulia – para anbia. Digambarkan oleh Raja Ali Haji dalam *Tuhfat al Nafis*, peranan utama raja pemerintah ialah menjunjung hukum Allah, bahawa krisis akan terjadi jika perintah Allah diingkari, dan apabila Raja memerintah dengan nafsu. Oleh itu, pemerintahan Kesultanan Melayu sangat menekankan prinsip mematuhi suruhan agama, bermuafakat dengan para pembesar, memastikan keadilan, peka dan bertimbang rasa terhadap rakyat.

## Sidang Jumaat yang dirahmati Allah,

Keunggulan sesebuah kerajaan bertitik tolak daripada kebijaksanaan raja memerintah dengan adil, selaras dengan waad atau perjanjian ikatan taat setia, raja dan rakyat, ‘raja adil – raja disembah’, yang dijadikan pedoman sepanjang tamadun berkerajaan dan bernegara di alam Melayu.

Alhamdulillah kita dikurniakan seorang sultan berjiwa ilmuwan, yang menyempurnakan amanah pemerintahan dengan sifat-sifat insani, serta peka kepada rintihan rakyat dan berusaha memastikan berlakunya keadilan berlandaskan hukum. Semoga kebijaksanaan pimpinan seorang Sultan, akan diperkukuhkan dengan nasihat barisan ulama yang tegas dan barisan umara yang ikhlas, akan diperlengkap dengan para peniaga yang jujur, akan didukung dengan ketaatsetiaan rakyat yang hidup harmoni, dan lebih utama akan dilimpahi cahaya petunjuk Ilahi. Semoga di negeri Perak Darul Ridzuan akan terbangun sebuah negeri yang mendapat keredaan Ilahi seperti yang digambarkan dalam ayat 15 Surah Saba’ , *baldatun toyyibatun wa rabbun ghafur*, sebuah negeri yang baik (nyaman) dilimpahi keamanan, kemakmuran, kesejahteraan dan keberkatan.

بَارَكَ اللَّهُ لِي وَلَكُمْ بِالْقُرْآنِ الْعَظِيمِ وَنَفَعَنِي وَإِيَّاكُمْ بِمَا فِيهِ مِنَ الْآيَاتِ وَالذِّكْرِ الْحَكِيمِ  
وَتَقَبَّلَ مِنِّي وَمِنْكُمْ تِلَاوَتَهُ إِنَّهُ هُوَ السَّمِيعُ الْعَلِيمُ. أَقُولُ قَوْلِي هَذَا وَأَسْتَغْفِرُ اللَّهَ الْعَظِيمَ  
لِي وَلَكُمْ وَلِسَائِرِ الْمُسْلِمِينَ وَالْمُسْلِمَاتِ وَالْمُؤْمِنِينَ وَالْمُؤْمِنَاتِ الْأَحْيَاءِ مِنْهُمْ وَالْأَمْوَاتِ  
فَاسْتَغْفِرُوهُ إِنَّهُ هُوَ الْغَفُورُ الرَّحِيمُ.

## Khutbah Kedua

الْحَمْدُ لِلَّهِ<sup>5</sup> الْقَائِلِ:

يَا أَيُّهَا الَّذِينَ ءَامَنُوا أَطِيعُوا اللَّهَ وَأَطِيعُوا الرَّسُولَ وَأُولِي الْأَمْرِ مِنْكُمْ فَإِن تَنَزَعْتُمْ فِي شَيْءٍ فَرُدُّوهُ إِلَى  
اللَّهِ وَالرَّسُولِ إِن كُنتُمْ تُؤْمِنُونَ بِاللَّهِ وَالْيَوْمِ الْآخِرِ ذَلِكَ خَيْرٌ وَأَحْسَنُ تَأْوِيلًا

(Surah An-Nisa’ 59)<sup>6</sup>

<sup>5</sup> Memuji Allah

<sup>6</sup> Ayat Al-Quran



Maksudnya: Wahai orang-orang yang beriman, taatlah kamu kepada Allah dan taatlah kamu kepada Rasul dan pemerintah di antara kamu. Maka jika kamu berselisih dalam sesuatu perkara maka kembalikanlah ia kepada Allah dan Rasul Nya jika kamu benar-benar beriman kepada Allah dan hari akhirat. Itu adalah lebih baik dan sebaik-baik akibatnya

أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ، وَأَشْهَدُ أَنَّ سَيِّدَنَا مُحَمَّدًا عَبْدُهُ وَرَسُولُهُ. اللَّهُمَّ صَلِّ وَسَلِّمْ عَلَى سَيِّدِنَا مُحَمَّدٍ<sup>7</sup> وَعَلَى آلِهِ وَصَحْبِهِ أَجْمَعِينَ. أَمَّا بَعْدُ، فَيَا عِبَادَ اللَّهِ! اتَّقُوا اللَّهَ<sup>8</sup>، أَوْصِيكُمْ وَإِيَّايَ بِتَقْوَى اللَّهِ، فَقَدْ فَازَ الْمُتَّقُونَ.

### **Muslimin yang dirahmati Allah,**

Bersempena sambutan ulang tahun hari keputeraan Paduka Seri Sultan kali ke-65, dipohonkan semoga Allah SWT melimpahi negeri Perak Darul Ridzuan dengan kemakmuran dan kesejahteraan di bawah payung pemerintahan Duli Yang Maha Mulia Sultan Nazrin Muizzuddin Shah. Ya Allah! kurniai baginda hikmah kebijaksanaan pemerintahan seperti yang pernah Engkau kurniakan kepada Nabi Daud Alaihissalam dan Nabi Sulaiman Alaihissalam, berpandukan ayat-ayat yang terkandung dalam Surah Shaad. Demikian juga dipohonkan untuk disingkap rahsia agar baginda menemui pedoman di sebalik kehebatan Zul-Qurnain, seorang raja yang bijaksana, beriman lagi soleh, memerintah dengan adil, seperti yang diperihalkan dalam Surah Al-Khafi.

Sebagai payung kedaulatan negara, sepanjang tempoh baginda menjunjung amanah seorang Amirulmukminin, Engkau kurniakan bimbingan agar baginda memberi naungan yang adil lagi saksama kepada setiap warga, tanpa mengira kaum – tanpa mengira agama, agar takhta pemerintahan diyakini berperanan sebagai tonggak kestabilan – sumber keadilan – teras perpaduan – tenaga penyatuan dalam kepelbagaian.

Seiring dengan gelaran Muizzuddin Shah, ‘muizzuddin’ bermaksud ‘pemerksa agama’, dan berpandukan keinsafan baginda bahawa kuasa pemerintahan ialah amanah daripada Illahi, semoga syiar Islam akan berkembang dan pemerintahan baginda didaulatkan dengan roh Islam,

إِنَّ اللَّهَ وَمَلَائِكَتَهُ يُصَلُّونَ عَلَى النَّبِيِّ يَا أَيُّهَا الَّذِينَ ءَامَنُوا صَلُّوا عَلَيْهِ وَسَلِّمُوا تَسْلِيمًا<sup>9</sup>

<sup>7</sup> Selawat ke atas Nabi Muhammad SAW

<sup>8</sup> Pesan Taqwa

<sup>9</sup> Ayat Al-Quran



اللَّهُمَّ صَلِّ عَلَى سَيِّدِنَا مُحَمَّدٍ وَعَلَى آلِهِ وَصَحْبِهِ وَسَلَّمَ. اللَّهُمَّ اغْفِرْ لِلْمُسْلِمِينَ وَالْمُسْلِمَاتِ  
وَالْمُؤْمِنِينَ وَالْمُؤْمِنَاتِ<sup>10</sup>، وَأَصْلِحْ ذَاتَ بَيْنِهِمْ وَأَلِّفْ بَيْنَ قُلُوبِهِمْ وَاجْعَلْ فِي قُلُوبِهِمُ الْإِيمَانَ  
وَالْحِكْمَةَ، وَثَبِّتْهُمْ عَلَى مِلَّةِ رَسُولِ اللَّهِ ﷺ. اللَّهُمَّ اذْفَعْ عَنَّا الْبَلَاءَ، وَالْوَبَاءَ، خُصُوصًا وَيْرُوسَ  
الْكُورُونَا، وَالْغَلَاءَ، وَالْمِحْنَ، وَالْفِتْنَ، مَا ظَهَرَ مِنْهَا وَمَا بَطَّنَ، عَن بَلَدِنَا هَذَا خَاصَّةً، وَعَن  
سَائِرِ بُلْدَانٍ عَامَّةً.

**Ya Allah**, berkatilah hamba-hamba Mu yang melaksanakan tuntutan zakat dan menghulurkan wakaf, kurniai mereka rezeki yang berlipat ganda, serta sucikanlah harta dan jiwa mereka. Jauhkanlah golongan *fuqara* dan *masakin* daripada kekufuran serta dihindari mereka daripada kefakiran yang berpanjangan.

**Ya Allah**, berilah kami kebaikan serta keberkatan di dunia dan di akhirat. Jauhilah kami daripada seksa dan azab api neraka.

**Ya Allah**, kurniakanlah taufik dan hidayah Mu ke atas Raja kami, Duli Yang Maha Mulia Paduka Seri Sultan Perak Darul Ridzuan, Sultan Nazrin Muizzuddin Shah Ibni Almarhum Sultan Azlan Muhibbuddin Shah Al-Maghfur-Lah, dan Raja Permaisuri Perak Darul Ridzuan Tuanku Zara Salim serta kerabat diraja dan seluruh rakyat jelata.

رَبَّنَا إِنَّا فِي الدُّنْيَا حَسَنَةٌ وَفِي الآخِرَةِ حَسَنَةٌ وَقِنَا عَذَابَ النَّارِ

فِيَا عِبَادَ اللَّهِ، ﴿إِنَّ اللَّهَ يَأْمُرُ بِالْعَدْلِ وَالْإِحْسَانِ وَإِيتَايِ ذِي الْقُرْبَىٰ وَيَنْهَىٰ عَنِ الْفَحْشَاءِ  
وَالْمُنْكَرِ وَالْبَغْيِ يَعِظُكُمْ لَعَلَّكُمْ تَذَكَّرُونَ﴾ ﴿فَاذْكُرُوا اللَّهَ الْعَظِيمَ يَذُكُرْكُمْ، وَاشْكُرُوا لَهُ عَلَى  
نِعْمِهِ يَزِدْكُمْ، وَاسْأَلُوهُ مِنْ فَضْلِهِ يُعْطِكُمْ، وَلِذِكْرِ اللَّهِ أَكْبَرُ، وَاللَّهُ يَعْلَمُ مَا تَصْنَعُونَ.﴾

<sup>10</sup> Doa untuk Kaum Muslimin